



分蜊崎滌著尿

「哦呵……阿姊(ze`)！嘴脣分蜊崎屙著尿了！」吾老弟心曰當鬼啊，看吾目珠塌塌、人懶頭懶頭、嘴脣發水膘仔，明知該就目毋足正會恁樣。佢無愛直堵來，想著用阿婆教个講法來笑佢，害蜊崎承著銃子。

「分蜊崎滌著尿」也有人講「火氣大」，華語安到「唇疱疹」，係「單純性疱疹病毒」第一型引起个，有感染著這種病毒正會發出來，同蜊崎一息仔關係就無。一旦感染過這種病毒，就算發過了、好了，病毒還係會怙怙仔囤在個身體裡背，等到個人過勞、目毋足、抵抗力較弱，佢又起起來，十分一般个症頭。毋過，水膘仔會熟該下，又癢又痛盡得人惱。係水膘仔放佢熟到爆開來，還會遭人——該央時，就毋好去咬細人哦，會遭著佢。摸過爛皮、搽藥仔个手乜愛洗淨來；做毋得摸了佢又去搯目珠，目珠會遭著，嚴重个話會青暈，異得人畏。好得這下有藥仔好膏，起勢癢痛就好遽遽去分先生看，藥仔膏落去發禍就會退，毋使放到佢睇開來。

「單純性疱疹病毒」(HSV)有兩型：第一型較會發到面項，第二型較會發到下身。還有一種發到中間个，恁俚講「發蛇」，華語安到「帶狀疱疹」。該係「水痘帶狀疱疹病毒」(VZV)引起个，頭一擺感染著這種病毒，毋會「發蛇」，係出「水痘仔」。水痘仔發忒，病毒會囤到背囊个神經節裡肚，身體一弱，佢就會發出來。該水膘仔牽牽擎行共下，就像有一條蛇哥纏在人个腰骨項共樣，故所正會安佢「發蛇」。講到口涎波潑，若人个係有看過樣仔！正經，吾細人仔讀小學仔時節就纏過一條在腰骨項；一般人就發一片，發到兩片就表示該儕人身體拗蠻仔弱，一百儕淨兩到十儕會恁樣。厥舅講：「夭壽阿姆……，毋遽遽帶佢去斬蛇！會害阿浩牯無命啊！」戇戇！這下麼个時代了，愛遽遽去分醫生看，有藥仔好醫。

人講「食藥三年會行醫」，毋過，藥仔斯莫食忒多較贏，醫藥个智識恁俚用手指對網路點啊去就有了。還係心放寬、目睡飽、元氣足，身體砸礮第一重要。

作者：彭瑞珠

☆詞彙學習☆

【鬼】gui`：古靈精怪、思維奇巧。

【一旦】id` dan`：通常、大體上。

【水膘仔】sui` peu e`：水泡。

【搯目珠】lui` mug` zu`：揉眼睛。

【目毋足】mug` m` jiug`：睡眠不足。

【斬蛇】zam` sa`：一種治療帶狀疱疹的民俗

【直堵】ciid du`：直接了當。

療法。

☆文法學習☆

【牽牽擎】kien` kien` qiu`：全部連結在一起。這是動詞重疊、後加補語的「VV + C補語」句式，用來加強語氣，表示動作果決、迅速進行。

例1：頭路做做擎，正好去寮！（工作都做好，才可以去玩！）

例2：天時恁熱，頭那毛剪剪短來，較直別。（天氣這麼熱，把頭髮剪短，比較舒暢。）